

TUSI TAIALA

**MO LE PULEA TATAU MA LE VA'AIA LELEI O
I'A MA FIGOTA O LE GATAIFALE**

O LE AFIOAGA O



SAUNIA:

Pule mamalu a Alii ma Faipule ma tagatanuu o le Afioga o VAILUUTAI ma le Lagolagosua a le Vaega o Faigafaiva.

Matagaluega o Faatoaga ma Faigafaiva

FAASOLOGA

1	UPU TOMUA.....	1
1.1	Autu o le Taiala.....	1
2	TULAFONO AUTU O FAIGAFAlVA	2
2.1	Tulafono Faatonutonu o Faigafaiva (mo le Laiti o l'a ma Figota).....	2
2.2	Tulafono Laiti a Afioga	2
3	FAAMATALAGA E UIGA I LE AFIOAGA	2
3.1	Gataifale o VAILUUTAI	3
4	FAIGAFAlVA I LE AFIOAGA ma FAAFITAUlI	3
4.1	Ituaiga Faigafaiva ma l'a Maua.....	4
4.2	Aotelega o Tulafono Faale-nuu tau Faigafaiva i Aso ua Mavae.....	4
5	O LENEI FUAFUAGA TATAU/TAIALA.....	5
5.1	Tapenaga	5
6	TOE ILOILOINA O LENEI TUSI TAIALA.....	6
7	FUAFUAGA FAATAATITIA ma TULAFONO.....	6
7.1	la Faamalositia Tulafono Faale-nuu e Faasaina ai Faigafaiva le Talafeagai.....	7
7.2	la faasalalauina Tulafono a le Afioga.....	8
7.3	Faasaina Upega ma Tili Matanini'i.....	8
7.4	Taofia le Faatafunaina o le Gataifale.....	9
7.5	la Aoina ma Faatama'ia Alamea.....	10
7.6	la Faasaina Tu'iga ma Faamo'a.....	11
7.7	la Faasaina le Fagotaina o i'a ma figota laiti.....	11
7.8	Faasao o le Gataifale o VAILUUTAI.....	12
7.9	la Faasaina ona toe Fagotaina fugafuga, mama'o, maisu ma isi o lenei ituaiga mo le faatauina atu i maketi i fafo.....	13
7.10	Faasaina ona toe Taina i lalo ma Tanumia Togatogo.....	13
7.11	la Taofia le eliina ma le laueseina o oneone mai le gataifale.....	14
7.12	Faasaina Faigafaiva mai isi Afioga.....	15
8	ILOILOGA O LENEI TAIALA.....	15
9	UPU FAAI'U.....	16
8	SUI AUAI I FONOTAGA MA FAATALATALANOAGA	16



Fa'alupega o le Afioaga

**AFIO LE TAULAGI MA LE
MA'OPÛ O LE TUIA'ANA
ALALATAI LE NOFOITUAIGA I
LE FALE FITU**

1 UPU TOMUA

O faigafaiva i gataifale o Samoa e taua tele mo le fofoga taumafa aemaise lava i afioaga i tua. I le tele o afioaga, latou te le o faatauina le pulea tatau ma le vaaia lelei o punaoa ma le siosiomaga o le gataifale. O le faia ma le faaogaina o ituaiga faigafaiva faa-onapo-nei e i ai mea manava, upega ma tili mataninii e faamata faigofie ai ma tele ai i'a maua ae o loo faaitiitia ai le tamaoaiga o le gataifale. O nisi o atinae ma galuega faatino ua faaleagaina ma faatamaia ai le tele o nofoaga ma meaola o le sami e pei o:-

- le tanumia o vaega o le gataifale mo eleele-fou (fanua);
- faigafaiva le talafeagai pei o fanaia, ava niukini, vailaau oona ma faamo'a/tuiga.

O nei faafitauli o loo tulai mai pea i gataifale o si o tatou atunuu, ua matua faaitiitia ai i'a ma figota ae le gata i lea o aafiaga i mala faanatura e pei o galu malolosi faapea matagi ma afā ua tuanai e pei o Ofa 1990, Val 1991 ma Heta 2004.

O i'a ma figota o le sami sa faamoemoe iai le fofoga taumafa o tagata Samoa, ae ona o faafitauli pei ona taua ua faatamaia ma faaitiitia ai nei punaoa o le sami ua tele ai ina taugata ai, faapea le faamoemoe o tagata Samoa i meaai tuu aisa ma meaai tuuapa o lo o faatauina mai atunuu i fafo. O se atugaluga lea o lo o iai i le taimi nei ae le gata i lea o le faamoemoe tele i le tupe aua mea taumafa i aso uma.

O le polokalame o le faasaoina ma pulea tatauina o le gataifale o Samoa na amata mai e le Ofisa o Faigafaiva i le tausaga 1995 i le faatupega mai le Malo Ausetalia (AusAid) mo le lima tausaga. E faataua ai le fesootaiga ma le galulue soosoo tauau ma afioaga aua le faatuina o latou ogasami faasao. O tualumaga o le polokalame e aofia ai le soalaupuleina ma le fausiaina o se Tusi Taiala e tamauina ai fuafuaga faataatitia a le afioaga faapea le Ofisa o Faigafaiva.

O se tasi o autu taua o lenei polokalame o le toe tapu'e mai lea o tamaoaiga ma faaoga tatau punaoa o le gataifale ma le sami ina ia maua pea aua tupulaga lalovaoa o Samoa. O le puleaina ma le lelei o lenei polokalame faasao i nuu, e i lima ma aao o afioaga lava o lo o faaogaina nei punaoa ma tamaoaiga.

O fuafuaga faataatitia i lenei Tusi Taiala e unaia ai le vaaia lelei aemaise le pulea ma le fuafua tatau o le faaogaina o le tamaoaiga o le gataifale ma le siosiomaga o VAILUUTAI.

1.1 Autu o le Taiala

O le autu lenei sa faatalatalanoaina ma malilie autasi i ai vaega uma o le afioaga o VAILUUTAI:

- la vaaia lelei ma pulea tatau le siosiomaga o le gataifale ;
- Toe faatupulaia punaoa ma tamaoaiga o le gataifale mo tupulaga i le lumanai.
- Puipuia ma faasaoina togatogo ma ona tamaoaiga

2 TULAFONO AUTU O FAIGAFAlVA

O le Tulafono Autu o Faigafalva, 1988 ua avea ma taiala mo puipuiga, galuega ma isi vaega tau faigafalva ma le sami e pei:-

- o le faasaina, puleaina ma le atina'eina;
- faasaina o le faia o faigafalva le talafeagai;
- faamalosia le laiseneina o vaa fagota mo fagotaga faapea le
- vaaia o taiala ma maliega aua le pulea tatau o faigafalva i le va ma atunuu i fafo.

O nei tulafono uma e le o lava le silafia e le toatele o tagatanuu o Samoa aemaise le faamalosia e afioaga. Ona o nei faafitauli ua taumafai ai le Polokalame Faasao o le Gataifale mo Afioaga e unaia nisi o vaega o loo faatinoina nei e pei o aoaoga faapea le fesoasoani tele i le faamalamalamaina mo le silafia e le mamalu o le atunuu o ia tulaga.

2.1 Tulafono Faatonutonu o Faigafalva (mo le Laiti o l'a ma Figota)

O le Tulafono Faatonutonu o Faigafalva 1995, e faatapulaaina ai le laiti o l'a ma Figota e fagotaina ma faapea ona faatauina ai nisi o vaega e pei o:-

- āiāiga mo le puipuiga ma le faasaina e aofia ai le faasaina ona fagotaina ma le faatauina o nisi o ituaiga o l'a ma figota;
- mea fagota e faasaina;
- pole mo fagotaga (faigafalva i tuaau);
- fua faatapulaa o l'a ma figota e faatagaina ma isi.


2.2 Tulafono Laiti a Afioaga

O Tulafono Laiti a nuu ma afioaga ua amanaia tele e le Faamasinoga. O se tasi lea o auala ua tuu sa'o ai e le Malo le malosi i nuu ma afioaga e mafai ai ona latou molia i le tulafono soo se tagata e le usitaia tulafono ua āiāia i totonu o le Tusi Taiala a lea afioaga. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaaia lelei o le gataifale i tulaga o ona tamaoiga ma lona siosiomaga mo se lumanai manuia. O tulafono laiti e soalaupule ma autasi iai le pule mamalu a alii ma faipule o afioaga lava.

3 FAAMATALAGA E UIGA I LE AFIOAGA

O le afioaga o VAILUUTAI e i le itu i Sísifo o le motu o Upolu, ma o se tasi o afioaga o le Itumalo o Aana. E matagofie ona laufanua ma lona atufalega faapea foi le talafatai o le gataifale.

Ata 1: Faafanua o Upolu o lo o faailoa mai ai le afioaga o VAILUUTAI



Vaega Faufautua (Ofisa Faigafaiva, 2008)

O le faitau aofai o tagata o le afioaga o VAILUUTAI e i le va o le 300 i le 400 (Ofisa o Tusigaigoa, 2001) e le o aofia ai i latou ua faimalaga atu ma aumau i Niusila, Ausetalia, Amerika ma isi atunuu i fafo. I totonu o le afioaga, o le toatele o tagata e nonofo latalata i le sami. E lua ni aoga i totonu o le afioaga e aoaoina ai alo ma fanau laiti. O le Aoga Faata'ita'i ma le Aoga Tulaga lua, a'o le toatele lava e aoaoina i Kolisi maualuga eseese i totonu le atunuu. E tolu ni fale tapua'i e iai le Ekalesia Mamona, Aso Fitu ma le Faapotopotoga Kerisiano i Samoa o loo tapua'i ai le afioaga. O nei tapuaiga o loo unaia ai le ola faa-kerisiano i totonu o VAILUUTAI, o se itu taua tele mo le nonofo fealofani o tupulaga aemaise le galulue faatasi o le afioaga i atina'e eseese.

O VAILUUTAI e mamalu ana pulega aua e puleaina lava e le Fono a Alii ma Faipule o le afioaga. O le aumaga e lava saunia i taimi uma aua le tautuaina o matai faapea tina latou te avatua fautuaga lelei mo ni mataupu tau lotofale o le afioaga.

3.1 Gataifale o VAILUUTAI

O le afioaga o VAILUUTAI e tu matafaga ma e gatasi maualalo lona laufanua. O lenei afioaga e iai lona a'au pe a ma le 300 mita le umi. O le mamao o le a'au mai le matafaga pe tusa ma le 800 mita. O le vaega e aupito sili ona loloto o le aloalo pe a pe elelee le tai e tusa ma le 50 futu. E iai foi se vaega tele o le talafatai e ola ai le togatogo, ma e faaaogaina tele mo le matauina o paalimago, ma i'a e pei o taiva, filoa, anae ma isi. E tusa ma le 5 eka le tele o le laufanua ua ola ai lenei togatogo.

4 FAIGAFIIVA I LE AFIOAGA ma FAAFITAU

I le faatinoga o faigafaiva i le afioaga, o alii e faatinoina fagotaga mau i le aloalo aemaise tua'au, pe a ma le 15 -20 faifaiva e fagotaga pe ta'i faatasi i le faatolu i le vaiaso. I fagotaga i tuaau a alii, e tele ina faaaogaina ai paopao. I fagotaga a le itupa o tamaitai, pe a ma le 7-15 i latou e fagotaina figota ma isi taumafa o le sami.

4.1 Ituaiga Faigafaiva ma l'a Maua

O nisi nei o ituaiga faigafaiva eseese o lo o faatinoina mo le fofoga taumafa o aiga, faalavelave i totonu o le afioaga ia po o le faatau foi mo tupe maua. O ia fagotaga e iai le:-

- Maulu ma le matatao/mata;
- Afaloloa;
- Upega ma tili;
- Fagāpusi;
- Toso pā
- Tuiga sea, loli, fugafuga mama'o ma ape faapea aoina o aliao ma faisua i luga o le a'au o lo o faatinoina e tina, tamaitai ma le fanau.

O le tele o i'a sa maua i aso ua mavae ua faigata ona maua i aso nei, ae a maua foi ua faaitiitia le faitau aofai faapea le lapopoa. O i'a ta'atele i le aloalo e iai:-

- Lo/pa'u'ulu;
- Mataelele/filoa;
- Ili'ilia, Ume;
- Gatala
- Fugausi ma laea
- Fā ma isi.

O le i'a o le fa sa matua tele naunau i tausaga ua mavae, peitai ua matua le toe maua lava. E iai foi figota i le gataifale ua vaaia le faaitiitia o le faitau aofai aemaise o le tele o ni itula e faaluina mo fagotaga pe'a faatusatusa i le tele o tausaga ua mavae. O nisi o figota ua faaitiitia ma ua faigata ona maua e iai:

- faisua;
- aliao ma alili.

O faafitauli ma suiga ua iai nei gataifale o VAILUUTAI e pei ona ta'ua, o le āia o le gataifale i galu malolosi ma afā faapea le faaitiitia o i'a maua ma figota sa tele i aso ua mavae ona o le soona fagotaina ma le faaaogaina o faigafaiva le talafeagai e pei o fanai'a, ava niukini, tu'iga ma isi. O le popolega o le afioaga ona o le tele o nei faafitauli i le gataifale o lo o faamoemoe iai le fofoga taumafa e le gata mo le taimi nei ae i le lumanai. O lea ua a'e ai se tofa i alii ma faipule ina ia pulea tatau ma vaaia lelei punaoa ma alamanuia o le gataifale.

4.2 Aotelega o Tulafono Faale-nuu tau Faigafaiva i Aso ua Mavae

O VAILUUTAI, e i ai ana tulafono i aso ua mavae ma o lo o faaauauina pea ma mamalu i le pulega a alii ma faipule. O ia tulafono e matua faasaina lava faigafaiva le talafeagai e pei o:

- Fanaia;
- Ava niukini;
- Vailaau oona;
- Faamo'a/Tu'iga;
- Faaogaina faatasi o tane maulu ma moliuila i lama (scuba gears) pei ona matua faasaina i tulafono o faigafaiva.

Ua faasaina foi tagata mai isi afioaga ona toe fagotaina gataifale o VAILUUTAI. E ui lava ina ua i ai tulafono e pei ona taua, ae le o atoatoa lona faatinoina ma lona va'aia ona o le lē aloaia e le 'au faifaiva mai isi afioaga. O le isi itu o le mamao lea i tai o nofoaga o loo faatinoina ai isi ituaiga o faigafaiva atoa ai ma auala o loo faaaogaina.

O nei tulafono o loo āiāia malosi i tulafono Autu o Faigafaiva ma amanaia e le pulega mamalu a alii ma faipule o VAILUUTAI ma le faamoemoe ina ia toe faamalosi atili.

5 O LENEI FUAFUAGA TATAU/TAIALA

E taua le fuafua lelei ma tulimata'i le sini autu o taumafai le mamalu o le afioaga e faataunuaina. O le faamoemoe maualuga o le Malo, ina ia faaleleia le soifua manuia o tagata o le afioaga ma ia faatupulaia atili mea taumafa mai le sami. O lea e manaomia ai le pulupululima o tagata uma o le afioaga i soo se faatinoga lelei e le gata e tua iai ae maua ai lo latou tamaoaiga. E pei ona ta'ua i le amataga, o le AUTU na talanoaina ma autasi uma iai finagalo o vaega taitasi o le afioaga i taimi o faatalatalanoaga:

- ✚ la pulea tatau ma vaaia lelei le siosiomaga o le gataifale;
- ✚ Toe faatupulaia punaoa ma tamaoaiga o le gataifale aua tupulaga i le lumanai.

5.1 Tapenaga

O lenei tapenaga sa saunia lava e le Fono a Alii ma Faipule ma tagatanuu o VAILUUTAI, faatasi ai ma le lagolagosua a le Ofisa o Faigafaiva. O se ootoga lenei i le tapenaga o lenei Tusi Taiala ina ua maea ni fonotaga sa faia pei ona faamatalaina atu i lalo.

5.1.1 *Feiloaiga Muamua a le Afioaga ma le Ofisa o Faigafaiva*

Sa faato'ai mai ai le finagalo o alii ma faipule i le Ofisa o Faigafaiva e faailoa mai ai lo latou fia auai i le Polokalame mo le puipuiga ma le faasaoina o gataifale i le aso 13 Aperila 1998. O le Aso 19 o Me 1998, sa faia ai loa se fonotaga muamua a le Ofisa ma le afioaga e faamalamalamaina ma taliaina ai le polokalame. O le maea o lenei feiloaiga muamua na taliaina lelei ai e le afioaga le polokalame ma faamautuina ai le aso mo faatalatalanoaga ma vaega e tolu o le afioaga.

5.1.2 *Faatalatalanoaga ma Vaega o le Afioaga*

O le faatinoga o faatalatalanoaga sa vaevaeina ai le afioaga i vaega e tolu o matai, aumaga ma tamaitai, ma sa faatautaia e le Ofisa o Faigafaiva mataupu taua i ia talanoaga. O nei faatalatalanoaga na mafai ai ona aoina mai ai manatu ma faamatalaga i faigafaiva, faafitauli o le gataifale aemaise ni fōfō e foia ai. E le gata i lea, o matafai ai a le afioaga i le faatinoina o galuega faapea matafai ai a le Ofisa o Faigafaiva e fesoasoani ai i le atinae Faasao o le Gataifale a le afioaga.

5.1.3 *Komiti Faufautua o le Faasao*

O le fonotaga a le Komiti Faufautua o le Faasao a le afioaga i le aso 26 Aperila 1998 sa iloiloina ai le ata o lenei Tusi Taiala. O lenei Komiti Faufautua sa filifilia ai sui e ta'i tolu mai i vaega o matai,

tina ma aumaga. O le matafaioi a le Komiti Faufautua o le tuufaatasia lea o faamaumauga ma faamatalaga sa aoina mai i faatalatalanoaga e pei ona ta'ua i luga.

5.1.4 Pasiaina o le Tusi Taiala i le Fono Mulimuli

O le fonotaga mulimuli i le 17 Iulai 1998 na talanoaina ai lenei Tusi Taiala sa tuuina aloaia i le fono a Matai e sui o le Komiti Faufautua ma le Ofisa o Faigafaiva mo le pasiaina.

O lenei foi fono na faailoa ai sui filifilia o le 'Komiti o le Faasao' e taita'ia le faagaioiga o fuafuaga ua uma ona fa'ata'atitia. O le faagasologa atoa o nei fuafuaga fa'ataatitia e aofia ai vaega e faatautaia e le afioaga faapea fuafuaga e faatautaia e le Ofisa o Faigafaiva e lagolagosua ai i le Faasao o le Gataifale a le afioaga.

6. TOE ILOILOINA O LENEI TUSI TAIALA

E pei ona faailoa atu i luga o VAILUUTAI ua leva ona auai i le Polokalme lenei ma fausia, pasia ai le Taiala lenei ia Iulai 1998. Ua maea foi ona fausia tulafono e malu puipuia ai le soona fagotaina faasolitulafono o le gataifale. E iai nisi o faamanuiaga sa tuuina muamua i le afioaga e pei o atinae faisua, faailoagaina o le Fasao o le Gataifale, vaa fagota laiti i tuaau, aoaoga i tomai eseese faa-faigafaiva faapea le pasiaina o tulafono laiti mo le afioaga.

O se vaitau o le 2001 sa le mafai ai e le afioaga ona toe faaauauina nei atina'e uma ma toe foi ai tagata e faatinoina faigafaiva le talafeagai. E afua nei faafitauli ona ua faatuatuanai e le pulega a alii ma faipule le faatauaina o lona gataifale faapea le polokalame Faasao a le Vaega o Faigafaiva. O le masina o Fepuari 2009 sa toe talosagaina ai e le Tofi pulenuu o le afioaga le Vaega o Faigafaiva se fesoasoani mo le toe faatinoina o le Polokalame i totonu o VAILUUTAI. Sa talia lelei lenei talosaga ma atofaina loa se fonotaga mo le toe iloiloina ma le faaleleia o fuafuaga ma tulafono o le Tusi Taiala lenei.

O le aso 11 Mati 2009 sa tauaofia ai le fonotaga a le Komiti Faufautua filifilia a le afioaga ma le Vaega o Faigafaiva mo le toe iloiloina ma le auiliiliina o fuafuaga uma o lenei Taiala. Sa fai foi ni suiga talafeagai i tulafono, faasalaga faapea mataifaioi faatino a le afioaga faapea le Vaega o Faigafaiva. O le sini autu ina ia mafai ona faaleleia tamaoiga o le gataifale ma le siosiomaga ma ia maua pea le soifua manuia lautele o tagatanuu o VAILUUTAI mai faaoga tatau o punaoa o le sami. O loo faailoa atu i lalo tulafono taitasi sa soalaupuleina i lea fonotaga.

7 FUAFUAGA FAATAATITIA ma TULAFONO

O fuafuaga faataatitia o ni gaioiga ua faamoemoe e tatau ona foia ai faafitauli ua faaalua ma faailoa mai e vaega eseese o le afioaga. E lua vaega o fuafuaga faataatitia ua fuafuaina:-

- Fuafuaga faataatitia ua faaāgaāga e faatino e le afioaga;
- Fuafuaga faataatitia mo le Ofisa o Faigafaiva lea e patino lava i le tuuina atu o fautuaga mo le FAASAO a le afioaga.

O fuafuaga faataatitia a le afioaga e pito sili ona taua aua e faaalagolago i le pulega mamalu a alii ma faipule le maopoopoga o le faatinoga. Ae o galuega uma lava e faatinoina e le Ofisa o

Faigafaiva e ao ona faamaonia e le Ofisa Sili Lagolago (Assitant Chief Executive Officer) a le Matagaluega o Faatoaga ma Faigafaiva.

O nisi o tulafono o ta'ua i lalo a le afioaga e faamamafa ai Tulafono Autu a le Malo e puipuia, faaoga ma pulea tatau ai punaoa ma alamanuia o le gataifale.

7.1 Ia Faamalosia Tulafono Faale-nuu e Faasaina ai Faigafaiva le Talafeagai

Otootoga

O nisi o faigafaiva ua mautinoa e ogaoga a latou aafiaga i le faatamaia o le fogatai ma le tele o meaola o le gataifale. O se faataitaiga o nei ituaiga faigafaiva le talafeagai e iai le faaogaina o vaillau o'ona, ava niukini, fanai'a faapea tu'iga poo faamo'a. Ua le gata ina faatamaia ai se vaega tele o le fogatai ae ua faapena foi ona faaumiumi se taimi e mafai ai ona toe faatupuina le tele o meaola o le gataifale ua aafia i nei ituaiga o faigafaiva.

Fuafuaga Faataatitia a le Afioaga

Ua faailoa mai e le Komiti Faufautua a le afioaga le toe faamalosia o puipuia a le afioaga e faamamalu ai tulafono ua faataatitia. Ma sa faatalanoaina i le fonotaga a le Komiti o le Faasao i le Aso 11 Mati 2009 le toe faamalosia ma unaia e le Komiti o le toe faasalalauina o tulafono ina ia malu puipuia ai tulaga o le atinae aemaise o le ogasami faasao.

7.1.1 *Tulafono*

Mo tagatanuu VAILUUTAI faapea tagata mai isi afioaga:-

“Ua matua faasaina lava faigafaiva le talafeagai e pei o fanai'a, ava niukini, vaillau oona faapea tu'iga/faamo'a i gataifale o VAILUUTAI.”

O le puipuia ma le faamamaluina o lenei tulafono o le a i aao o alii ma faipule ma le lagolagosua a le afioaga.

7.1.2 *Faasalaga*

Mo soo se tagata o le afioaga e maua ua ia solia lea tulafono, o le a noatia i se sala tupe e \$500.00 Mo tagata mai isi afioaga, o le a molia sao i le *Tulafono Laiti a le Afioaga* poo le *Tulafono Autu o Faigafaiva, 1988*.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva mo le faatinoina o fuafuaga faataatitia i lalo o lenei polokalame o Faasao o le Gataifale. E le gata i lea ae o le tuuina atu o faamatalaga ma fautuaga mo le faamautuina o fuafuaga, atoa ai ma le faasalalauina o nei tulafono a le afioaga.

7.2 Ia Faasalalauina Tulafono a le Afioaga

Otootoga

Na fautuaina e le Komiti le faasalalauina o tulafono a le afioaga ua faataatitia mo le faamoemoe ia puipuia le siosiomaga o le gataifale ma ona tamaoaiga faapea faigafaiva. Sa talanoaina foi e le Komiti, e ao ona toe faasalalauina tulafono Autu o Faigafaiva faatasi ai ma isi tulafono pei ona pasia i lenei Taiala aua le silafia e tagata lautele e tusa o aiāiga uma o nei tulafono. O le fonotaga i le aso 11 Mati 2009, na faatalosagaina ai e le Komiti a le afioaga se fesoasoani a le Malo mo le faasalalauina o nei tulafono e ala atu i le Ofisa o Faigafaiva, ina ia mautu lelei ma faataunuuna lea fuafuaga.

Fautuaga ma le Faamoemoe

Ina ia silafia ai e le atunuu aemaise ai o afioaga tuaoi nei tulafono, ma ia faapea foi ona nofouta i ai e tusa o faasalaga ua āiāia e alii ma faipule o VAILUUTAI.

Autu o le Faasalalauina: *"Puipuiga o le Gataifale ma le Togatogo o VAILUUTAI"*.

Fautuaga a le Komiti

O le faasalalauina o tulafono o lenei Tusi Taiala o le a faatinoina lea e Alii ma Faipule o le afioaga.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva i le tapenaina o Tulafono Laiti a le afioaga mo le pasiaina ma faasalalauina mo le silafia e le atunuu. O le a tufaina atu foi kopi o nei tulafono i afioaga tuaoi mo le silafia lautele.

7.3 Faasaina Upega ma Tili Matanini'i

Otootoga

Sa toe faamautuina mai e le Komiti Faufautua o le Gataifale le alagatatau ona usitaia pea o le Tulafono a le Malo. Na ioeina ai e le Komiti le lagolagoina o le Tulafono Faatonutonu mo Faigafaiva 1995 ua pasiaina. O lenei tulafono o lo o aofia ai matāupega mo upega ma tili faapea pa i'a e faatagaina i fagotaga.

Fautuaga

Sa fautuaina e le Komiti le Ofisa o Faigafaiva ina ia taofia le faatauina mai e le Faleoloa o Faatoaga o upega mata nini'i, ae peitai sa faaalua e le Ofisa o Faigafaiva e le mafai ona faia lea tulaga i le taimi nei ona o nei upega o lo o faaaogaina i isi galuega e pei o togalaau aina atoa ai ma isi atinae e puipui mai ai i iniseti faalafua.

Sa faaalua e le Ofisa o Faigafaiva o loo iai tulafono a le Malo ua maea ona pasiaina e faatatau i le faaaogaina o nei upega mo fagotaga ma ua faamalosi nei foi e le Malo faasalaga mo soo se tasi e solia lenei tulafono.

O lea ua finagalo ai le Komiti ina ia avefa tulafono a le Malo o loo iai nei e fai ma tulafono a le afio'aga e uiga i upega ma tili matanini'i.

7.3.1 Tulafono

Mo tagatanuu o VAILUUTAI faapea tagata ese mai isi afioaga:-

"Ua matua faasaina lava ona toe faaaogaina matāupega e i lalo ifo o le 2 inisi pe 50mm (fua pe a

sūsū le upega), i gataifale o VAILUUTAI.”

“Ua matua faasaina foi ona toe faaogaina upega tomatu ma tili e i lalo ifo o le 1.2 inisi pe 30mm (fua pe a sūsū le tili) i gataifale o le afioaga.”

O le puipuiga ma le faamamaluina o lenei tulafono o le a i aao o le pule a alii ma faipule ma le afioaga.

7.3.2 Faasalaga

Mo soo se tagata o VAILUUTAI e maua ua ia solia le tulafono, o le a noatia i se sala tupe e \$100.00, ae mo tagata mai isi afioaga, o le a molia sao i *Tulafono Autu o Faigafaiva, 1988.*

Fuafuaga Faataatitia a le Ofisa o Faigafaiva





O le a fesoasoani le Ofisa o Faigafaiva i le tapenaina o Tulafono Laiti a le afioaga ma tuuina atu pepa o faamatalaga o ituaiga i'a ma figota o loo aafia i le Tulafono Autu o Faigafaiva

7.4 Taofia le Faatafunaina o le Gataifale: Faasaina le Lafoai o Otaota ma Lapisi i le Matafaga ma le Sami

Otootoga

O se tasi lenei o vaega o loo aafia i tulafono ua maea ona faasalalauina ma ua ioeina e le Komiti ina ia aafia ai ma le puipuiga o le togatogo ona ua avea foi ma nofoaga e o faatafunaga o lapisi.

O le lafoai o otaota i le sami, matafaga ma togatogo o le a:

-  avea ma mafuaaga ma nofoaga e tautuufua ai namu, mogamoa ma isi inseti faalafuā;
-  faamanu'alia pe lavevea ai tagata lautele i atigi apa ma atigi fagu, aemaise le avea ma puna'aga o faama'i;
-  avea ma nofoaga e le talafeagai mo meaola o le sami;
-  atagia ai le le faatauaina e le afio'aga o le gataifale ma le tele o ona alamanuia ma nisi o ona tamaoaiga.

Fuafuaga Faataatitia a le Afioaga

O le faamoemoe o le afioaga ia foia nei faafitauli ma ia fausiaina pe iai se nofoaga e lafoai uma iai otaota a le afioaga atoa. Faataitaiga, e mafai ona lafoai otaota i se lua ma ufiufi malu aua le saogalemu mai faama'i ma siana feavea'i. Talu ai e mafai ona tafe ma ulu atu le oona o lapisi poo vaila'au o loo lafoaiina i lea lua, o lea e fautuaina ai le afioaga, ina ia eliina se lua i se nofoaga mamao esee mai puna vai taumafa faapea le sami.

O le fautuaga a le Komiti, o le faia ma faamauina lea o se tulafono e taofia ai tagata VAILUUTAI ma isi afioaga tua'oi ona toe lafoai ni otaota ma lapisi i le gataifale.

Ua faailoa foi e le Komiti le faia o asiasiga aai tai 2 vaiaso, ma faamalositia foi aiga taitasi e faaogaga le taavale lapisi mo le aoina ma le lauina o nei otota.

7.4.1 Tulafono

Mo taganuu o VAILUUTAI faapea tagata ese mai isi afioaga:-

“Ua matua faasaina lava ona toe lafoai otaota ma lapisi e pei o atigi apa, atigi fagu, uamea, pepa iila ma isi ituaiga i le Togatogo, matafaga ma le talafatai o VAILUUTAI.”

O le puipuga ma le faamamaluina o lenei tulafono o le a i aao o alii ma faipule

7.4.2 Faasalaga

O soo se tasi e solia lenei tulafono o le a faasalaina i le \$200.00 a le aiga. A le usita'ia loa lenei faasalaga, o le a tuuina atu i le pule a alii ma faipule pe molia loa i Tulafono Laiti a le afioaga.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva e toe faamautuina Tulafono Laiti, tuuina atu pepa o faamatalaga mo le silafia lautele o le afioaga.

7.5 la Aoina ma Faatama'ia Alamea

Otootoga

O le alamea o se meaola o le ituaiga o le aveau, ma e nofo pe maua i luga o a'au ma amu i le sami. O le alamea na te aina pe ola i meaola ninii ua ta'ua o polipe o loo fausiaina ai amu. A oo ina faateleina lenei meaola o le alamea, o le a faapena ona latou tapēina ma faatamaia a'au ma amu o lo o pipii ma ola ai. O le popolega o le afioaga, o le a i se tulaga pagatia le tele o meaola i le aloalo o loo faalagolago i le a'au ma amu mo meaai ma nofoaga e ola ai. E le mafai ona faaumatia pe tapēina lenei meaola i le sami. Aua foi, e mafai e le alamea ona toe ola pe tatupu ona itutino pe ola mai ai isi alamea fou seia vagana lava ua aumaia i le pa'umatū ma faamamagoina ai i le la, pe susunuina foi.

E pei ona faailoa mai e aumaga ma le au tautai, o le alamea o se tasi lea o faafitauli mo faigafaiva o loo iai nei i gataifale o VAILUUTAI.

Fautuaga Faataatitia a le afioaga

la aoina ma faaputuina e le afioaga alamea pe a latou va'aia pe tau foi iai i taimi o fagotaga. la aumaia i uta nei meaola ma tanumia pe faamagoina ai. Sa fautuaina foi ma faaali finagalo o alii ma faipule o VAILUUTAI, o le a taumafai le aumaga atoa ma le au tautai e latou te aoina mai le alamea ma faatamaia i uta.

Taimi Fautuaina

la faaauau le aoina o lenei meaola faalafuā i taimi uma ma aso uma. O lenei taumafaiga, o se auala e puipuia ai amu, siosiomaga ma le tamaoiga o le gataifale.

Fuafuaga Faataatitia a le Ofisa o Faigafaiva

O le faamalamalamaina o ni fesili e faatatau i lenei fuafuaga i le aoina o le alamea, sa faapupulaina ai i le afioaga e leai se polokalame a le Malo e totogi ai le aoina ma le faatamaia o le alamea. Ae e fesoasoani pea le Ofisa o Faigafaiva e tuuina atu faamatalaga ma fautuaga mo auala e tineia ai le alamea mai gataifale o VAILUUTAI.

7.6 la Faasaina tu'iga ma faamo'a

Otootoga

O tu'iga ma famo'a ua maitauina e le afioaga le matua faaleagaina ai o le gataifale. O ituaiga faiva nei e faigofie ona maua ai i'a ma figota; peitai e ogaoga ma matautia ona aafiaga. E ui ina seāseā ona toe faatinoina peitai ua manatu lava le Komiti Faufautua le tatau lava ona tuuina i lenei Taiala

Fuafuaga Faataatitia a le Afioaga

Ua iai se finagalo le Komiti e toe faamautuina le tulafono sa iai muamua ua faailoa atu i lalo.

7.6.1 Tulafono

Mo tagatanuu o VAILUUTAI faapea faifaiva mai isi afioaga:-

"Ua matua faasaina lava ona toe faatinoina faigafaiva e pei o tu'iga ma faamo'a i gataifale o le nuu."

7.6.2 Faasalaga

Soo se tasi lava e faia lenei ituaiga faiva i gataifale o VAILUUTAI, o le a noatia i se sala tupe e \$500.00. Mo tagata mai isi afioaga o le a molia i le Tulafono laiti a le afioaga e tauala atu i le Vaega o Faigafaiva

Fuafuaga a le Ofisa o Faigafaiva

O le a fesoasoani le Ofisa o Faigafaiva mo le faatinoina o Tulafono laiti a le afioaga ma tufaina atu fuafuaga faataatitia a le afioaga e ala atu i le Polokalame o Faasao faailoa pea le taua o le puipuia

7.7 la Faasaina le Fagotaina o l'a ma Figota Laiti

Otootoga

O lenei fuafuaga tatau e taua mo i'a ma figota laiti ia latou maua ai se avanoa e fanafanau ai ae le'i fagotaina mai e le aufaifaiva. Aua afai ae fagotaina mai i'a ma figota laiti ae le'i o'o i le lapopoa/matutua e fananau ai o lona uiga ua le mafai ona fanafanau mai ai nisi i'a ma figota o le sami ina ia faatupulaia ai ia punaoa. Afai o le a faaauauina pea lea tulaga, o le a saga faaitiitia ai le faitau aofai o i'a ma figota o le sami.

Fuafuaga faataatitia a le Afioaga

Ua faaalii le lagolagoina e le Komiti Faufautua a le afioaga o Tulafono Faatonotonu o Faigafaiva ua pasiaina o lo o āiāiā ai fua faatapula'a mo le laiti o i'a ma figota e tatau ona fagotaina mai.

7.7.1 Tulafono

Mo tagatanuu o VAILUUTAI faapea ai faifaiva mai isi afioaga:-

"Ua faasaina ona toe fagotaina i'a ma figota laiti mai le gataifale o VAILUUTAI, e pei ona faaalii i le Tulafono Faatonotonu o Faigafaiva a le Malo".

O le puipuiga ma le faamamaluina o lenei tulafono o le a i aao o alii ma faipule ma le afioaga o VAILUUTAI faapea le lagolagosua a le Vaega o Faigafaiva.

7.7.2 Faasalaga

Mo soo se tagata o VAILUUTAI e maua ua ia solia lea tulafono, o le a noatia i se sala tupe e \$100.00, ae mo tagata mai isi afioaga, o le a molia sao i *Tulafono Faatonutonu o Faigafaiva, 1995*.

Fuafuaga Faataatitia a le Ofisa o Faigafaiva

O auanaga a le Vaega o Faigafaiva i lalo o le Polokalame Faasao e aofia ai le tuuina atu o Pepa o Faamatalaga o loo iai i'a ma figota o loo aafia i lenei Tulafono. Ia faatinoina foi ni aoaoga mo le afioaga i aiaiga uma ma le sao o tagata nuu i le faamalosia o lenei tulafono.






7.8 Faasao o le Gataifale o VAILUUTAI

Otootoga

O se vaega o le gataifale ua faasaoina, e tatau ona le toe faatinoina ai ni faigafaiva. O le avea o lea vaega o le gataifale ma ogasami faasao e tatau ona malu puipuia lona siosiomaga. O autu taua o lenei ogasami faasao, e faasaoina ai amu ma a'au faapea i'a ma figota ina ia mafai ona maua e nei meaola se nofoaga malu e ola, tautuufua ma fanafanau ai ma tafea atu o latou fua-fanau ma faatupuina ai meaola o le sami.

Fuafuaga Faataatitia a le Afioaga

Ua faamautuina mai e le Komiti Fauautua le tatau ona galulue faatasi ma le Vaega o Faigafaiva i le:

-  faatinoina o se suesuega i le vaega ua faailogaina e le afioaga e avea ma Faasao o le Gataifale;
-  saunia ma faamalamalamaina le lipoti o ni faaiuga o lenei suesuega;
-  tuuina mai o fautuaga talafeagai mo le taulau manuia o le Faasao
-  faasalalauina tulafono ma o le Faasao
-  a'oa'oina sui o le afioaga i metotia ma auala e vaaia lelei ma mataitūina ai le ola o amu, i'a ma isi alamanuia o le Faasao

7.8.1 Tulafono

Mo tagatanuu o VAILUUTAI faapea ai faifaiva mai isi afioaga:-

“Ua matua faasaina lava soo se tagata o VAILUUTAI faapea nisi faigafaiva mai isi afioaga ona toe faia soo se isi lava ituaiga o fagotaga i le vaega o le aloalo ua faasaoina ma faailogaina”

7.8.2 Faasalaga

Mo soo se tagata o VAILUUTAI e maua ua ia solia lenei tulafono, o le a noatia i se sala tupe e \$500.00 ae mo tagata mai isi afioaga, o le a molia i *Tulafono Laiti* a lenei afioaga.

O le puipuiga ma le faamamaluina o lenei tulafono o le a i aao o alii ma faipule ma le afioaga o VAILUUTAI.

Fuafuaga Faataatitia a le Ofisa o Faigafaiva

E ao i le Ofisa o Faigafaiva ona:

- ☞ faatinoina manaoga talafeagai ua tuuina mai e le afioaga;
- ☞ tuuina aloaia atu i le Komiti o le Faasao se lipoti o suesuega ma ni fautuaga talafeagai mo le silafia e le afioaga
- ☞ tuuina atu ni fautuaga ma ni faamatalaga mo le tausiga, pulea tatau ma le vaaia lelei o le ogasami faasao o le gataifale a le afioaga.

7.9 la faasaina ona toe fagotaina fugafuga, mama’o, maisu ma isi o lenei ituaiga mo le faatauina atu i maketi i fafo

Otootoga

O figota e pei o fugafuga, sea, mama’o, maisu ma isi o loo fagotaina mai mo taumafa pe faatau atu foi mo tupe maua a tagata faifaiva aemaise lava tinā ma tamaiitai. O nei ituaiga figota e faigofie ona maua aua e aumau ma nonofo i vaega papa’u ma lauoneone. Sa faailoa mai e le Komiti o le fagotaina o lenei tamaoaga mo le faatau atu i le afaipisinisi ma la’uina mo maketi i atunuu mamao, na matua iloga ona tafieseina ai lenei figota ma faaititia ai i le talafatai o le afioaga. I le taimi nei ua seāseā ona toe maua ni fagusea se lua i le itula a se tinā fagota.

Fuafuaga Faataatitia a le Afioaga

O le fonotaga a le Komiti ia Mati 2009 sa toe faamalosia ai le tulafono e taofia ai pea le faatauina faapisinisi o lenei ituaiga punaoa sei vagana lava mo le fofoga taumafa.

7.9.1 Tulafono

Mo tagatanuu o VAILUUTAI faapea ai faifaiva mai isi afioaga:-

“Ua matua faasaina lava soo se tagata o VAILUUTAI faapea nisi faigafaiva mai isi afioaga ona toe fagotaina fugafuga, mama’o, maisu poo soo se isi lava ituaiga o nei punaoa mo le faatauina atu i pisinisi mo maketi i fafo sei vagana lava mo le fofoga taumafa”

7.9.2 Faasalaga

Mo soo se tagata o VAILUUTAI e maua ua ia solia lenei tulafono, o le a noatia i se sala tupe e \$500.00. Mo le au-faapisinisi e laueseina pe fagotaina le gataifale o VAILUUTAI mo lenei punaoa o le a noatia i se sala tupe e \$1000.00 poo le molia i le Tuafono Laiti a le afioaga e tauala atu i le Vaega o Faigafaiva”.

Fuafuaga Faataatitia a le Ofisa o Faigafaiva

O auaunaga a le Vaega o Faigafaiva i lalo o le Polokalame Faasao e aofia ai le faia o Tulafono Laiti ma tuuina atu Pepa o Faamatalaga e faailoa ai le taua o nei punaoa. Ia faatinoina foi ni aoaoga mo le afioaga i aiaiga uma ma le sao o tagata nuu i le faamalosia o lenei tulafono.

7.10 Faasaina ona toe taina, tanumia Togatogo

Otootoga

O Togatogo o se tasi lenei o punaoa ua tele lona sao i le gataifale mo le toe faatupuina o nisi o i’a ma figota. Ua avea lenei nofoaga ma apitaga, lafitaga o le tele o meaola e pei o tāiva, anae, filoa,

paalimago ma tugane ma fai fo'i ma ofaga o nisi o manulele e iai toloa, matu'u, tulī ma isi. O le tele fo'i o meaola nini'i ua avea Togatogo ma sulufaiga mai o latou fili. E aoga foi e taofia le palapala mai le tafia ese, puipuia mai ai foi laufanua ma tagata soifua mai aafiaga o galu malolosi ma lologa. Afai ae taina ma tanumia nei Togatogo, o le a faaitiitia pea tamaoaiga o le tai mo le fofoga taumafa ma afaina ai le tausiga o aiga ma fanau i le lumanai.

Fuafuaga Faataatitia a le Afioga

O le toe iloiloina o lenei Taiala na matua faaamautuina ai e le Komiti o le Gataifale le tulafono a le afioga mo le puipuia mai o Togatogo mai le faaleagaina, taina i lalo faapea le tanumia. O le a fautuaina foi e le Komiti le Fono mo le faamamaluina o lenei tulafono.

7.10.1 Tulafono

Mo tagatanuu o VAILUUTAI faapea tagata mai isi afioga:-

“Ua matua faasaina lava ona toe taina i lalo, faaleagaina pe tanumia foi Togatogo o le afioga. Ua avea foi lenei nofoaga ma Vaega Faasao o le Gataifale o VAILUUTAI”.

7.10.2 Faasalaga

Mo soo se tagata o VAILUUTAI e maua ua ia solia lenei tulafono, o le a tuuina atu i a'ao o Alii ma Faipule, ae mo tagata mai isi afioga, o le a molia i Tulafono Laiti a lenei nuu.

O le puipuiga ma le faamamaluina o lenei tulafono o le a i aao o alii ma faipule ma le afioga o VAILUUTAI

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva mo le faatinoina o Tulafono Laiti a le afioga e ala atu i le Polokalame Faasao faapea le tuuina atu o faamalamalamaina o le taua o Togatogo i le siosiomaga o le tagata soifua faapea le gataifale

7.11 la taofia ma faasaina le eliina ma laueseina o oneone mai le gataifale

Otootoga

O le faatelēina o apitagalu ma matafaga mai le fetafeaiga o au ma galu malolosi ona o fesuaiga o le tau, ua faapogai mai lea ina ua tele se vaega o oneone o le matafaga poo apitagalu ua toesea pe asuina. Ua avea foi le asuina o le oneone ma mafu'aga ua faaitiitia ai ona toe ofaga le tele o meaola e pei o fugafuga, mama'o ma isi o loo aumau i nei vaega o le gataifale. O le tele o le palapala tafia ma le pefu o le a tafe atu ma ufitia ai amu ola ma filogia ai le suasami ona ua eliina maualalo le oneone ma faaleagaina ai vaega e tautuufua ai i'a ma meaola e pei o laumei. O le eliina foi o le oneone i vaega lalata i togatogo, punavai ma vaitafe e matua ogaoga lava se aafiaga o le siosiomaga o le gataifale e ono tulai mai.

Fuafuaga a le afioga

Ua manatu le Komiti faufautua e fautuaina le fonu a alii ma faipule e toe faamalosi le tulafono e taofia ai le toe eliina pe lauese ai foi le oneone mai le gataifale o le nuu. Ua faaalai foi lo latou lagolagoina o tulafono a le Malo faapea aiaiga talafeagai mo le puipuiga o le gataifale. O tagata

lava o le afioaga e manaomia le oneone mo galuega e soalaupule lava e le Komiti, ao le au faipisinisi e matua faasaina lava.

7.11.1 Tulafono

“Ua matua faasaina soo se tagata, kamupani faipisinisi ona eliina pe lauina le oneone poo ni maa mai le gataifale i faiga faasolitulafono mai le talafatai o VAILUUTAI.”

7.11.2 Faasalaga

O le a noatia i se sala tupe e \$1000.00 soo se tasi e le usitai lenei tulafono poo le molia foi i Tulafono Laiti a le afioaga.

Fuafuaga a le Vaega o Faigafaiva

Tuuina atu fautuaga e ala i polokalame faaaoaoga ma pepa o faamatalaga. E saunia foi le faia o Tualafono Laiti e lagolago ai manaoga o le afioaga.

7.12 Faasaina faigafaiva mai isi Afioaga

Otootoga

Ua maitauina e le afioaga o VAILUUTAI le faatupulaia pea o tagata fagogota mai isi afioaga ua fagotaina punaoa eseese o le aloalo . O le tele o nei faigafaiva ua faaogaina metotia le talafeagai ma soona fagotaina foi ma le le fuafua tatau nisi o tamaoaiga e pei o sea, ape, mama’o, loli faapea foi i’a eseese.

Fuafuaga Faataatitia a le afioaga

Sa iloiloina ma le toto’a e le Komiti lenei faafitauli ma toe teuteu ai loa le tulafono e pei ona faailoa atu i lalo. O le a fautuaina foi le Fono a alii ma faipule i lenei fuafuaga.

7.12.1 Tulafono

“Ua matua faasaina lava soo se tagata ma nisi afioaga ona faatinoina fagotaga le talafeagai ua faamauina i totonu o lenei Taiala”.

7.12.2 Faasalaga

“O le a molia i le Tulafono Laiti a le afioaga soo se tagata e solia lenei tulafono”.

Fuafuaga Faataatitia a le Ofisa o Faigafaiva

O le a matua lagolagoina e le Vaega o Faigafaiva lenei fuafuaga a le afioaga ma o le a faatinoina foi le Tualafono Laiti e pei ona fautuaina.

8 ILOILOGA O LE TAIALA

Ua iai se maliliega i le Komiti Faufautua o le Gataifale o VAILUUTAI ma le VAEGA O FAIGAFAlVA o le a faaauau pea ona toe iloiloina le taulau manuia o lenei Taiala pe a mavae le ono (6) masina. O lenei iloiloga o le a iloa ma mautinoa ai le alualu lelei poo ni faaletonu fo’i e feagai ma le

faatinoina o galuega o lenei Taiala. O le a mafai foi ona faia ni fautuaga mo le lelei atili ma soalaupule foi ni faafitauli e ono tulai mai.

9 UPU MULIMULI

O le toe auai mai o le afioaga o VAILUUTAI i le POLOKALAME MO LE PULEA TATAU O TAMAOAIGA O LE GATAIFALE o se tofā ma se faautuga loloto, poo se faamoemoe ua matua sili ona talafeagai, ma ua mautinoa le manuia o le afio'aga i ni tausaga o i luma pe afai ae tumau ona faaaauuina pea. O le manuia ma le alualu i luma o lenei polokalame e faalagolago tele i le galulue faatasi o le afioaga, i le pule mamalu a alii ma faipule, komiti a tina ma tamaitai, aumaga aemaise o le Malo e tau ala atu i le Ofisa o Faigafaiva i le faatinoina o fuafuaga faataatitia ua maea soalaupule i le tele o fonotaga ma faatalatalanoaga sa faia.

O lenei polokalame o se galuega e umi se taimi e faatatali ai lona taulau manuia ae peitai ua mautinoa o le toe faaleleia ai lea o alamanuia o le gataifale e faalagolago iai le afioaga. O i latou o le a talisapaia ma 'ae'ae i nei manuia, o tagatanuu lava o le afioaga faapea tupulaga i le lumanai. O lea ua a'e ai se tofa i le afio'aga e galulue faatasi i lenei polokalame a le Malo ma Afioaga e fesoasoani ai e toe tapu'e mai le tamaoaiga o le gataifale ua tauau ina mou atu.

10 SUI AUAI I LE FONOTAGA SA TOE ILOILOINA AI LENEI FUAFUAGA TATAU

O loo faailoa foi i lenei TAIALA suafa o'i latou sa faatinoina le Iloiloga o lenei Fuafuaga Tatau. O sui mamalu foi ia o le Afioaga ua filifilia e fai ma Komiti Faufautua o le Gataifale latou te faatinoina ma mataitūina le faatinoina o fuafuaga faataatitia ma galuega mo le faaleleia o le gataifale ma ona punaoa eseese.

<u>SUAFA</u>	<u>TOFIGA</u>	<u>TELEFONI</u>
1. Faasina Faasina	(pulenuu)	Tel 7513943/42458
2. Tuigamala Taimua	matai	7590109
3. Lauano Felagai	matai	7231210
4. Sola Samu	matai	7743455
6. Lea'itua Fitu	matai	42594
7. Lio Titi		
8. Talilau Fono Tasele	matai	7786023/42198
9. Falefia Sa		
10. Atigilauga Falesa		
11. Aliioaana Teuari		
12. Taufono Vaosa		



Komiti Faufautua o le Gataifale-VAILUUTAI